

DEN AMBIENTE

CU NOS ARTISTANAN



Jan Poets

ARTISTA INVITA DI SIMAN

Claudius Philips



DESPUES di a pasa un temporada di Carnaval sumamente activo, cu interrupcion pa no perde lesnan importante di su estudio na Boston, e siman aki a sali di regreso pa Merca e famoso Claudius Philips.

Sin duda alguno el a laga un bunita impresion atras cu su roadmarch cu a termina na segundo lugar, pero toch bon toca durante Parada. "Ki tin?

Party!"

Prome cu Claudius a subi e vuelo di American Airlines, el a ser entrevista door di DEN AMBIENTE. E cantautor a laga sa cu su estudio ta bayendo hopi bon mes y cu posiblemente e lo termina esaki na fin di Mei. Despues cu e termina esun actual, e ta desea di ricibi un otro beca di Gobierno of di UNOCA pa asina e bay pa

profesional.

Ta asina cu Curaçao a ofrece Claudius Philips un suma hopi atractivo pa di e manera ey introduci Calypso den Carnaval na Curaçao, tabata difícil pa laga Aruba durante carnaval.

Claudius su plannan ta pa termina cu su longplay nobo cu sigur ta mes bon cu esun anterior, y e ta spera cu pueblo Arubano y Antiyano acept. E album mes lo ta riba mercado na luna di April, y e ta spera tambe di por sigui graba hunto cu e principe Arubano, Hildward Croes.

Encuanto e Festival Tumba ABC, Claudius a mostra cu aunke esaki ta nos cultura, "nos a sa di sali ganador aunke decision no a bay na nos favor."

El a bisa cu Aruba a duna un bon presentacion cu hasta a pone e fanaticada di Curaçao goza un mundo.

Claudius ya caba a cuminsa prepara pa otro aña, si e Caribbean Calypso Festival tuma lugar, pa asina hiba Aruba su Calypso rond Caribe.

Aunke Boston tin su malo y bon, e ta gusta e ciudad ey. Como cu e no ta gusta e holor y huma di cigarra, e ta prefera di keda su so den un apartamento. Nos di DEN AMBIENTE ta desea Claudius tur clase di exito cu su estudio y tambe cu su longplay nobo.

Claudius ta gradici e pueblo Arubano masha hopi mes durante tur su presentacionnan di Carnaval, cu ta un gran estímulo pe. E ta gradici tambe Carlos de Freitas y The Aruban Band cu a percura pa e ta na Aruba cada fin di siman. Gratiud tambe na Dora Pieters y Bupi Groder kende a patrosina Claudius durante Carnaval.